

1720-ԱԿԱՆ ԹՎԱԿԱՆՆԵՐԻ ՍՅՈՒՆՑԱՑ ԱԶԱՏԱԳՐԱԿԱՆ
ՇԱՐԺՄԱՆ ՊԱՏՄՈՒԹՅՈՒՆԻՑ

(Սկզբնաղբյուրների համադրման փորձ)

Ա. Մ. ԱՅՎԱԶՅԱՆ

1720-ական թվականներին Սյունիքում բռնկված ազատագրական պատերազմի պատմության ուսումնասիրման հիմնական սկզբնաղբյուրը եղել է 1871 թ. Ա. Դուլամիրյանցի հրատարակած «Ընտիր պատմութիւն Դաւիթ Բէգին» երկը¹: 1978 թ. Վենետիկում լույս տեսան այս աղբյուրի հեղինակային նախնական զույգ գրառումները (պատումները) և նրանց հիման վրա նույն հեղինակի՝ Ղուկաս վրդ. Սեբաստացու կազմած «Համապատում» բնագիրը²: Այս ամբողջական հրատարակությունն օժտված է Ս. վրդ. Արամյանի ջանադիր և մանրազնին բնագրագիտական հետազոտությամբ, որով պարզվեց շափազանց կարևոր մի հարց. Դուլամիրյանցի հրատարակության հիմք ձևագրերը ծագել է Ղ. վրդ. Սեբաստացու շարադրած Համապատում բնագրի հեղինակային օրինակից, որն էլ հիմնված է ավելի վաղ նույն հեղինակի³ գրած՝ Ստեփանոս Շահումյանի և Տեր Ավետիք քահանայի բանավոր պատումների վրա⁴: Ս. Արամյանը հանգամանորեն ներկայացրել է նաև Ղ. Սեբաստացու խմբագրած բուն բնագրի նկատմամբ Ա. Դուլամիրյանցի հրատարակության բոլոր շեղումները⁵: Սակայն ցարդ մասնագետների ուշադրությունից դուրս են մնացել նախնական պատումների և Ղ. Սեբաստացու Համապատումի միջև եղած զգալի տարբերությունները: Հ. Դ. Փափազյանը, վերջերս հրապարակված մի հոդվածում, իրավացիորեն մատնանշել է Ղ. Սեբաստացու կողմից նախնական բնագրերի սխալ ընկալման երկու դեպք⁶: Համապատումի այդպիսի շեղումները բավական շատ են. նրանց բացահայտումը և պարզաբանումը հաճախ զգալիորեն սրբագրում են 1720-ականների Սյունյաց ապստամբության մասին մեր իմացությունները:

Նախնական պատումների և Համապատում բնագրի բարեխիղճ գիտական հրատարակությունը եզակի հնարավորություն է ընձեռում քննելու XVIII դարի առաջին կեսի պատմագիր Ղ. Սեբաստացու երկի ստեղծման՝ նախնա-

1 Դաւիթ Բէգ. Ընտիր պատմութիւն Դաւիթ Բէգին եւ պատերազմաց Հայոցն իսպանու, որք եղեն ընդդմ թուրքաց ի մերում ժամանակի, այն է յամի Տեառն 1722, եւ Հայոց 1171: Վաղարշապատ. 1871:

2 Դաւիթ Բէկ կամ «Պատմութիւն Ղափանցւոց». Վենետիկ—Ս. Ղազար. 1978 (այսուհետև՝ Պատմութիւն Ղափանցւոց):

3 Նույն տեղում, էջ 62—92:

4 Տե՛ս Պատմութիւն Ղափանցւոց. Պատում Ստեփան Շահումեանի, էջ 119—130 (այսուհետև՝ ՊՄՇ). Պատում Տէր Աւետիք քահանայի, էջ 131—143 (այսուհետև՝ ՊՏԱ) և Համապատում բնագրի, խմբ. հ. Ղ. վրդ. Սեբաստացի, էջ 147—181 (այսուհետև՝ Համապատում): Ուսումնասիրության ընթացքում նպատակահարմար համարեցինք առանձին՝ Զորացուցակ անունով ընդդռնել ևս մեկ հատված՝ Դավիթ-բեկի զորավարների ցանկը և Տեր-Ավետիքին նվիրված ներբողը, էջ 143—145 (այսուհետև՝ Զորացուցակ):

5 Տե՛ս Պատմութիւն Ղափանցւոց, էջ 197—222:

6 Հ. Դ. Փափազյան. Դավիթ-բեկի պայքարը օսմանյան ներխուժման դեմ և հաղթանակների իրանական հակաօսմանյան դիմադրական ուժերի հետ.—«Պատմա-բանասիրական հ. հր.», 1997, № 1, էջ 98—99:

կան պատումները խմբագրելու և ի մի բերելու ընթացքում կիրառված սկզբունքների ու մոտեցումների համակարգը:

Սյունիք-Արցախի ազատամարտին վերաբերող հարակից նյութերի ընդգրկմամբ շարադրված այս հոդվածը, «Ղափանցուց պատմության» երեք բնագրերի աղբյուրագիտական-պատմագիտական վերլուծության մեր առաջին փորձն է:

* * *

Նախնական երկու պատումների ունեցած տարբերությունները բացահայտվում են պատմական կարևոր մի դրվագի՝ Դավիթ-բեկի Սյունիք գալու մասին պատմող տեղերում: Ահա թե ինչպես են այդ դեպքը նկարագրում Ս. Շահումյանը և Տեր-Ավետիքը:

Ս. Շահումյան. «Եւ ել նա յերեսաց իշխանին Վրաց եւ գնաց ժողովեաց իւր զօրս երկու հազար սպառազինաց եւ զքսան հարիւրապետս (որոց անուանքն են այսոքիկ. Ավթանդել, Կեօրկի, Կեօրկի փոքր կոչեցեալ, Ծատուր, Ղարակեօզ, Թաթոս, Նղիազար, Յարութին, եւայլն, եւ Ստեփանոս ընդ նոսա), եւ եկն եմուտ նոքօք ի գաւառն Սիւնեաց: Ազդ եղև գաւառապետին նախիջեանու՝ եթէ Դաւութ Պէկն երթայ ի հափան, զօրաժողով լինիլ անդ: Եւ նա երկոտասան հազարաւ ի վերայ Դաւութ Պէկին: Իսկ նա իբրեւ լուաւ զայս, հրաման ետ զօրս ժողովել ի տանէն Սիսանայ, եւ ժողովեալ խմբեցին ոչորս հազարս արանց, եւ զառաջին երկու հազարսն յաւելեալ ի նոսա՝ եղեն վեց հազար վառեալք ի պատերազմ, եւ նոքօք հանդերձ ճակատեցաւ ի վերայ Նախիջեանու գետոյն՝ ընդդէմ հանին: Արդ՝ իբրեւ բախեցան ընդ միմեանս, զօրքն հանին ի փախուստ դարձան, եւ սոքա զկնի նոցա պնդեալ փախստեալս տանէին ի 18 ժամէ աւուրն մինչեւ ց21 ժամն վանեցին: Եւ ի 22 ժամուն փախստեալքն ամենեքեան ի միասին հաւաքեցան ի կրունկս ընդդէմ Հայոցն դարձան: Իսկ Հայքն փախստեալք եղեն ի նոցանէ մինչեւ ի գետափն. 2200 մարդ գետակուր եղեն. իսկ Դաւութ Պէկն, Ավթանդէլն, եւ երկոքեան Կօրկիքն ամրացան ի վէմ մի յափն գետոյն, եւ անտի մինչեւ ց2 ժամ գիշերոյն հասին ի Սիսան, եւ ամենայն դերժեալքն ի փախստէից ժողովեցան ի վերայ Դաւութ Պէկին» (ՊՄՇ, էջ 121):

Տեր-Ավետիք. «Արդ՝ եկեալ Դաւիթ Պէկն ի հափան 412 արամբ բանակեցաւ ի տեղին որ կոչի Իւդէփէ, եւ անդ մարտեաւ զառաջինն ընդ Ղարաշօու կոչեցեալ Թուրքաց, եւ յաղթեաց նոցա: Եւ ապա եկեալ բնակեցաւ ի յամուրն որ կոչի Շնհեր...» (ՊՏԱ, էջ 131):

Համապատումը նույն իրադարձությունները ներկայացնում է այսպես. «Եւ նա յերեսաց իշխանին Վրաց, եւ եկն էհաս յաշխարհն Սիւնեաց յամի Տեառն 1722 եւ ի թուին Հայոց Ռ. Ճ. Հ. Ա. եւ բանակեցաւ ի սահմանս Սիսան գաւառին, ի գեղեցիկ դաշտավայրն յայն Երեքդաղաթեան, որ ի յայլասեռից կոչի Իւթէփէ: ...Իբրեւ ելանէր յերկրէն Վրաց, առ նա ժողովէին ամենայն ազգ զօրութեանց յամենայն կողմանց գաւառին, որք լսէին ղնմանէ, արք իբրեւ չորեք հարիւրք...: Արդ՝ զառաջինն հարկանելով էհար Դաւիթ զՂարաշօու կոչեցեալ Թուրքն ի յիւթէփէն: Եւ ապա անտի եկեալ բնակեցաւ ի յամուրն որ կոչի Շնհեր» (Համապատում, էջ 149—150):

Այսպիսով, տեսնում ենք, որ այս դրվագի խմբագրման ժամանակ Ղ. Սեբաստացին նախապատվությունը տվել է Տեր-Ավետիքի հաղորդմանը, որի համաձայն՝ Սյունիքում Դավիթ-բեկի մղած առաջին ճակատամարտը տեղի է ունեցել Եռաբլրում (Ութեփեում), Դավթի հետ եկած ջոկատում եղել է մոտ 400 մարտիկ և այլն: Ըստ այսմ պետք է աշխատենք պարզել Ղ. Սեբաստացու այսպիսի ընտրության առաջնորդ սկզբունքը:

Համապատումն ուշադիր քննելով նկատեցինք, որ Նախիջևան գետի վրա կայացած ճակատամարտի մասին Ս. Շահումյանի հաղորդումը չի անտեսվել և հայտնվել է Համապատումի ժամանակագրական առումով բոլորովին այլ տեղում՝ Որոտնա բերդի գրավման նկարագրությունից անմիջապես հետո՝ «Ի յամին երրորդի, յետ գալստեան իւրոյ (Դավիթ-բեկի—Ա. Ա.) ի Ղափան» (Համապատում, էջ 153): Ամբողջությամբ բերում ենք Համապատումի

այդ հատվածը: «Եւ եղեւ ընդ աւուրսն ընդ այնոսիկ (Որոտնա բերդի գրավման օրերից հետո—Ա. Ա.) առաքել զբազմութիւն զօրաց իւրոց ի վերայ Թուրքացն Պարկուշատայ, եւ ինքեան սակաւուք մնալ ի Սիսան գաւառի: Եւ ի վերայ նորա խանն Նախիջեւանու շորեքտասան հազարաւ. իբրեւ զայն լսէր 'Դաւիթ' զօրաժողով լինէր վաղվաղակի, ի Դարպասայ եւ ի տանէն Սիսանաւ գունդ կազմէր. եւ դայր հասանէր նմա ի վերայ գետոյն Նախիջեւանու. եւ անդ իբրեւ ընդ միմեանս բախեցան երկոքին ճակատքն, զօրքն խանին փախստեայ լինէին ի սոցանէ, եւ սոքա զհետ մտանէին նոցա ի յութ եւ տասն ժամէ աւուրն մինչեւ ցքսան եւ միերորդ ժամն վանէին, եւ զբազում վիրաւորս ի նոցանէ դիաթաւալ կացուցանէին: Բայց ի քսան եւ երկուերորդ ժամուն փախստեայքն ամենեքեան ի միասին հաւաքեցան եւ ի կրունկս ընդդէմ Հալոցն դարձան. իսկ սոքա իբրեւ զայն յանդուգն յարձակումն տեսանէին՝ լքանէին, կասէին եւ ի փախուստ դառնային ի նոցանէ մինչեւ ցգետափն. եւ անդ առ ի ճեպոյն տազնապի, էր որ գետակուր լինէր, եւ էր որ սրոյ ճարակ լինէր, զի պաշարեաց զնոսա սուր թշնամեացն զկնի, եւ յորդեալ գետն առաջի, եւ ոչ գոյր այլ ելք ճանապարհի. ուստի՝ յայնմիկ վայրի ծախեցան ի սոցանէ աւելի քան զհազար այր, մինչեւ ցհասանել գիշերոյն, եւ մնացեալքն փախուցեայ թաքեան ոմն ի վէմս, ոմն ի յայրս եւ ի մացառաւ. եւ յերկրորդ պահու գիշերոյն եկն էհաս Դաւիթ ի Սիսան, եւ փախըստեայքն ամենեքեան եկին ժողովեցան առ նա» (Համապատում, էջ 153):

Այն հարցին, թե ինչու է Ս. Շահումյանի հաղորդումը խմբագրվելուց հետո հայտնվել Համապատումի հենց այս և ոչ որևէ այլ տեղում, կարելի է պատասխանել Տեր-Ավետիքի պատումի հետևյալ հատվածի օգնությամբ. «(Դավիթ-բեկը) եկեալ պաշարեաց զմեծագոյն եւ զանառիկ բերդն Որոտնու, եւ էառ զայն յետ շորից աւուրց, ի տօնի Ծաղկազարդին: Եւ եղեւ յետ այնորիկ առաքել զբազմութիւն զօրաց իւրոց ի վերայ Պարկուշատու, եւ ինքն մնաց սակաւուք ի Սիսան գաւառի: Եւ ել ի վերայ նորայ խանն Նախիջեւանու շորեքտասան հազարաւ ի պատերազմ, եւ անկան ի նմին պատերազմի ի Հալոցն իննհարիւր այր: Եւ անտի եկն Դաւիթ Պէկն ի Հալիձոր...» (ՊՏԱ, էջ 133—134):

Անենք առաջին եզրակացությունները: Համապատումը ստեղծելիս Ղ. Սեբաստացին նախ ուշադիր զննել է նույն դեպքի մասին իրարից զգալիորեն տարբեր զույգ հաղորդումները, ապա նկատել է Տեր-Ավետիքի պատումի բերված հատվածը, ուր նույնպես պատմվում է Դավիթ-բեկի և Նախիջեւանի խանի հորքերի ընդհարման մասին: Ս. Շահումյանի պատումում Նախիջեւանի խանի հետ որևէ այլ բախման մասին տեղեկություն չտեսնելով, նա մտածել է. թե Նախիջեւանի խանի դեմ մղված կռիվների մասին Ս. Շահումյանի և Տեր-Ավետիքի հաղորդումները վերաբերում են միևնույն ճակատամարտին: Եվ, քանի որ Դավիթ-բեկի գործունեության սկզբնական շրջանի մասին Տեր-Ավետիքը խոսում է շատ ավելի հանգամանորեն, քան Ս. Շահումյանը (Տե՛ս ՊՏԱ. էջ 131—132. հմտ. ՊՄՇ, էջ 121—122), Ղ. Սեբաստացին ժամանակագրորեն առավել հավաստի է համարել առաջինի պատմածները և Շահումյանի տեղեկություններով օժտել է Տեր-Ավետիքի «Համապատասխան» հաղորդումը, իր կարծիքով, լրացնելով այն «բացակայող մանրամասնություններով», և շտկելով Ա. Շահումյանի «սխալը»:

Այժմ «Ղափանցվոց պատմության» հեղինակային երեք բնագրերի և Ղափանի ապստամբությանը վերաբերող այլ նյութերի օգտագործումով քննենք այն հարցը, թե որքանով է հիմնավորված նախնական պատումներում հիշատակված երկու մարտերի նույնացումը և միահյուսումը Համապատումի մեջ: Նախ թվարկենք Նախիջեւանի խանի հետ ընդհարման դրվագին վերաբերող նախնական պատումների հաղորդումների ունեցած տարբերությունները.

1. Ժամանակագրական.

Ըստ Ս. Շահումյանի, ճակատամարտը տեղի է ունեցել Դավիթ-բեկի Սյունիք մտնելուց անմիջապես հետո:

Տեր-Ավետիքի համաձայն, բախումը եղել է շատ ավելի ուշ՝ օր յամին երրորդի, յետ գալստեան իւրոյ ի Ղափանս:

2. Պատմական իրադրութեան.

Երկու պատումներում հիշատակվող ճակատամարտերը տեղի են ունենում ռազմաքաղաքական բոլորովին տարբեր իրադրութեաններում. մի դեպքում (Ս. Շահումյան) Դավիթ-բեկը հազիվ հասցնում է անցկացնել իր առաջին զորահավաքը, այն էլ միայն Սիսիան գավառում, մյուս դեպքում (Տեր-Ավետիք) արդեն երրորդ տարին է, ինչ գոյատևում է Ղափանի հայոց անկախ իշխանութունը. Դավիթ-բեկի զորքի մի մասը արշավել է դեպի Բարգուշատ, իսկ նա, փոքրաքանակ զորքով, մնացել է Սիսիան գավառում:

3. Թվային.

ա) Ս. Շահումյանը հստակ ասում է, որ Դավիթ-բեկն իր հետ Սյունիք է բերել 2 000 «սպառազինաց» և 20 հարյուրապետ: Տեղեկանալով նախիջեվանի խանի արշավանքի մասին, նա հասցնում է Սիսիան գավառից հավաքագրել ևս 4 000 զինվոր՝ «եւ զառաջին երկու հազարսն յաւելեալ ի նոսա»՝ եղեն վեց հազար վառեալք ի պատերազմս⁷:

Տեր-Ավետիքը նշում է սոսկ, որ նախիջեանի խանի հարձակման պահին Դավիթ-բեկը մնացել էր «սակաւուք ի Սիսան գաւառի»:

Ղ. Սեբաստացին, հավաստի համարելով Տեր-Ավետիքի հաղորդումը, ուր ասված է նաև, թե Դավիթ-բեկը Ղափան է մտել 412 հոգուց բաղկացած ջոկատով, Ս. Շահումյանի վերը նշված թվական տեղեկութունները Համապատասխանաբար կոչում է թողել:

բ) Նախիջեանի խանի զորաբանակը, Ս. Շահումյանի համաձայն, բաղկացած էր 12 000, ըստ Տեր-Ավետիքի՝ 14 000 հոգուց:

գ) Տարբեր են հայոց զորքի կրած կորուստները. Ս. Շահումյանի համաձայն՝ 2 200 զինվոր, Տեր-Ավետիքի տվյալներով՝ 900 զինվոր: Այս հարցում Ղ. Սեբաստացին հետևել է խմբագրական ուղագրով սկզբունքի. իր լրատուների հաղորդած երկու տարբեր թվերը Համապատասխան մեջ արտահայտել է նրանց միջինով, միաժամանակ, ավելի հակվելով Տեր-Ավետիքի հաղորդած թվի կողմը՝ «աւելի քան զհազար այլոս»: Այսպիսի մոտեցումը թերևս բացատրելի է երկու հանգամանքով. առաջին և գլխավորը. ելնելով երկու ճակատամարտերի նույնացման իր վերոհիշյալ եզրահանգումից, Ղ. Սեբաստացին Շահումյանի համապատասխան հաղորդումն ամբողջությամբ համարել է պակաս արժանահավատ, երկրորդ՝ Տեր-Ավետիքի պատումում ղոճերի թիվն ավելի փոքր է, ուրեմն էլ՝ ավելի քիչ է տուժում հայոց զորքի համբավը, և պակաս է վրդովվում ընթերցողը:

4. Հայոց զորքերի նախնային ձևի և ուղղութեան տարբերութունները.

Ըստ Ս. Շահումյանի, վախճանից մազապուրծ Դավիթ-բեկը վերադարձել է Սիսիան՝ «եւ անտի մինչեւ ց2 ժամ գիշերոյն հասին ի Սիսան, եւ ամենայն զերծեալքն ի փախստէից ժողովեցան ի վերայ Դաւութ Պէկինս»:

Տեր-Ավետիքը պատմում է, որ մեծ կորուստներ պատճառած մարտից հետո «անտի եկն Դաւիթ Պէկին ի Հալիճորս»: Այստեղ նահանջի խուճապահարույթյան մասին խոսք չկա. պատմողի հանգիստ տոնը հուշում է, որ այն կանոնավոր բնույթ է ունեցել:

Այսպիսով, ըստ ամենայնի, Ս. Շահումյանը և Տեր-Ավետիքը նկարագրում են տարբեր ճակատամարտեր, իսկ Ղ. Սեբաստացին դրանք նույնաց-

⁷ Դավիթ-բեկի հետ Սյունիք եկած զորքի թիվը՝ 2 000, Ս. Շահումյանը նշում է էրեք անգամ (տե՛ս ՊՄԵ, էջ 121), հետևաբար, այդ թիվը թյուրիմացության արդյունք չամարելը բոլորովին անհիմն է. Ա. Գ. Աբրահամյանը, ծանոթ լինելով նախնական բնագրին. գրում էր. «Շահումյանցը, հավանական է, 2000 հոգի ասելով, նկատի է ունեցել Սյունիքի զինված ուժերի թիվը» (տե՛ս Ա. Գ. Աբրահամյան. Սյունիքի XVIII դարի ազատագրական շարժման պատմության շուրջ.— «Պատմա-բանասիրական հանդես», 1972, № 4, էջ 168): Այս կարծիքն անտեղի է նաև այն պատճառով, որ Ս. Շահումյանը նշել է նաև Դավիթ-բեկի յետ եկած հարյուրապետների թիվը՝ 20, որը համընկնում է 2 000 հոգեանոց զորքի թվին:

րեւ է սխալմամբ: Ինչպես շուտով կտեսնենք, թյուրիմացության աղբյուրը եղել է XVII—XVIII դարերում «Ղափան» տեղանվան գործածության բազմանշանակությունը:

Ստեփաննոս Շահումյանի պատումի համաձայն, Նախիջևանի խանի շտապ արշավելու գլխավոր նպատակն էր՝ կասեցնել Դավիթ-բեկի մոտերը Ղափան և այնտեղ անցկացվելիք հնարավոր զորահավաքը. «(Դավիթ-բեկը) եկն հմուտ նոքօք (2000 զինվորների հետ—Ա. Ա.) ի գալառն Սիւնեաց: Ազդեղե գաւառապետին Նախիջևանու՞մ եթէ Դաւութ Պէկն երթայ ի Խափան, զօրածողով լինիլ անդ: Եւ նա երկոտասան հազարաւ ի վերայ Դաւութ Պէկին»⁸:

Այս հատվածում Շահումյանը հստակորեն նշում է, որ Դավիթ-բեկն արդեն եկել էր Սյունիք՝ «ի գալառն Սիւնեաց», բայց Ղափան դեռ չէր հասել: Սյունս նախադասությունից արդեն պարզվում է, որ նա գտնվում էր Սյունիքի գավառներից մեկում՝ Սիսիանում. լսելով Նախիջևանի խանի զորքերի առաջխաղացման մասին, Դավիթ-բեկը «հրաման ետ զօրս ժողովել ի Խափան»:

Այսպիսով, Ս. Շահումյանի այս հաղորդումը խիստ տրամաբանական է և համոզիչ: Մանրամասն նկարագրությունը վկայում է, որ Շահումյանը անձամբ մասնակցել է Սիսիանում և Նախիջևան գետի վրա ծավալված անցքերին: Առհասարակ, դժվար է հավատալ, որ Դավիթ-բեկի հետ վրաստանից Հայաստան մտած Շահումյանը առաջին ճակատամարտը կարողանար շփոթել երկու տարի անց տեղի ունեցածի հետ:

Դրմենք Տեր-Ավետիքի պատումին. «Արդ՝ եկեալ Դաւիթ Պէկն ի Խափան 412 արամբ բանակեցաւ ի տեղին որ կոչի Իւջդէփէ, եւ անդ մարտեաւ զառաջինն ընդ Ղարաշուլու կոչեցեալ Թուրքաց, եւ յաղթեաց նոցա: Եւ ապա եկեալ բնակեցաւ ի յամուրն որ կոչի Շահեր»:

Եռարկի սարահարթը (Եռակատար, Ուլթեփե, Ուլթափալար, Իւջդեփե) ձգվում է Սիսիան գավառի արևելյան սահմանային մասից՝ Սորժորի հովտից դեպի հարավ-արևմուտք՝ մինչև Գորիս գետի կիրճը¹⁰: Սարահարթի կենտրոնով անցնում է Նախիջևան—Սիսիան—Գորիս—Շուշի—Բարդա հնուց ի վեր հայտնի ճանապարհը¹¹: Ճանապարհի աջ կողմում գտնվում է Եռարկուր (Ուլթեփե) լեռնագագաթը (2124 մ)¹², Շահերից (Շինուհայր) մոտ 7 կմ հյուսիս-արևմուտք, Հարժիս գյուղից՝ 4 կմ հյուսիս-արևելք, որտեղ և Դավիթ-բեկը ջախջախեց Ղարաշուլուներին¹³: Անկասկած, նախքան ընդհարումը Դավիթ-

⁸ Դեռևս Իսրայել Օրին Նախիջևանի խանին անվանում էր «ամենառիսերիմ թշնամի»՝ «А тот хан нам неприятель паче всех» (Տե՛ս Армяно-русские отношения в 1-ой трети XVIII века. сборник документов. т. II. ч. I. ред. Аш. Иоаннисян. Ереван, 1964, (այսուհետև՝ АРО, т. II, ч. I), с. 212:

⁹ Այս և հետագա բոլոր ընդգծումները մերն են:

¹⁰ Տե՛ս Թ. Հակոբյան, Ս. Մելիք-Քաջյան, Հ. Բարսեղյան. Հայաստանի և հարակից շրջանների տեղանունների բառարան. հ. 2, Երևան, 1988, էջ 205:

¹¹ Ստ. Լիսիցյան. Զանգեզուրի հայերը. Երևան, 1969, էջ 44, 92: Աջ. Հովհաննիսյան. Դրվագներ հայ ազատագրական մտքի պատմության. գ. II, Երևան, 1959, էջ 231—232: Թ. Խ. Հակոբյան. Սյունիքի թագավորությունը. Երևան, 1966, էջ 99—100: Դիվան հայ վիմագրության, պրակ II, Գորիսի, Սիսիանի և Ղափանի շրջաններ. Կազմեց Ս. Գ. Բարխուդարյան, Երևան, 1960, էջ 81:

¹² Նորերս լույս տեսած «Հայաստանի և հարակից շրջանների տեղանունների բառարանում» Եռարկուր բարձրությունը, սխալմամբ, նշված է 3355 մ (տե՛ս Թ. Հակոբյան, Ս. Մելիք-Քաջյան, Հ. Բարսեղյան. նշվ. աշխ., հ. 2, էջ 206: Համտ. Հայկական սովետական հանրագիտարան. հ. 3, Երևան, 1977, էջ 519):

¹³ Դ. Աղոնցը 1937 թ. գրում էր, որ Ուլթեփե, որը գտնվում է «Գորիսից Սիսիան տանող ճանապարհի վրա», XIX դ. վերջում—XX դ. սկզբում շարունակվում էր վատահամբավ վայր մեալ և ավելացնում. «Ժողովուրդների հետ ընդհարումները շարունակվում են ցայժմ Ուլթեփեից մինչև Նախիջևան»—Տե՛ս Ն. Ադոնց, Դավիթ-բեկ և Տեր-Ավետիքի սերունդը.—«Հայրենիք» (ամսագիր. Բոստոն, 1937, № 2, էջ 70:

բեկն իր ջոկատով շարժվելիս է եղել այդ բանուկ ճանապարհով՝ Շնհերի Եղ-դությամբ, բայց ավելի կարևորն այն է, որ Եղարուտին նա կարող էր հասնել միայն Սիսիան գավառի միջով անցնելուց հետո:

Ըստ այսմ պարզ է, որ Տեր-Ավետիքն իր պատումն սկսում է Դավիթ-բեկի մուտքից ոչ թե Սյունիքի, այլ՝ բուն Ղափանի տարածք, ուստի և նրա շարադրանքից դուրս են մնում Սիսիանում տեղի ունեցած իրադարձությունները:

Զմոռանանք նաև, որ Դավիթ-բեկի Սյունիքում գտնվելու սկզբնական շրջանում Տեր-Ավետիքը և իր աներ մելիք Փարսադանը նրա հետ չեն եղել: Նրանք Դավիթ բեկին ներկայացել են միայն 1723 թ. գարնանը՝ Զատկի տոնին Զավնդուրում հայկական զորքերի տարած խոշոր հաղթանակից որոշ ժամանակ անց (Տե՛ս ՊՏԱ, էջ 132—133. հմմտ. Համապատում, էջ 151): Ուստի Վրաստանից հայկական զորաջոկատի Սյունիք գալու և Սիսիանում ու Նախիջևան գետի մոտ ծավալված իրադարձությունների վերաբերյալ Ստեփան Շահումյանի տեղեկությունների պետք է համարել առավել արժանահավատ, քանի որ վերջինս ի սկզբանե Դավիթ-բեկի հետ էր:

Ուշագրավ է նաև Դավիթ-բեկի հետ Եղարուտի սարահարթ հասած զինվորների թվաքանակը՝ 412 հոգի: Եթե նկատի առնենք այն հանգամանքը, որ Նախիջևանի խանի դեմ ճակատամարտում Դավթի 6 000-անոց զորաբանակը (2 000-ը՝ իր հետ Վրաստանից եկածները, 4 000-ը՝ սիսիանցի մարտիկները) մեծ կորուստներ էր կրել (ըստ Շահումյանի՝ 2 200 հոգի գետախեղդ էին եղել), ապա 412 զինվորների թիվը միանգամայն ընդունելի պիտի համարել. պարտությունից հետո Սիսիանի զինվորությունը մնալու էր իր տեղում՝ թըշնամու մուտքը զավառ արգելելու համար, իսկ Դավիթ-բեկի հետ եկած 2 000 մարտիկներից շատերը զոհվել էին, ոմանք էլ, հնարավոր է, առաջին իսկ անհաջողությունից հետո լքել էին նրան:

Փոքր-ինչ շեղվելով բուն նյութից, անորադառնանք հայագիտության մեջ արմատացած այն թյուր կարծիքին, թե իբր Դավիթ-բեկը Սյունիք է մտել ընդամենը 30—40 հոգիանոց ջոկատով¹⁴:

Ա. Գուլամիրյանցի հրատարակությունից, որի հիմքը Համապատումի մի ընդօրինակությունն է¹⁵ և որից մինչև վեներտիկյան բնագրերի լույս ընծայումը օգտվել են բոլոր ուսումնասիրողները, պարզորոշ երևում է, որ Ղարաշու-լունների հետ ընդհարման սրահին Դավիթ-բեկի ջոկատը բաղկացած էր մոտավորապես 400 հոգուց՝ «արք իբրե շորեք հարիր»¹⁶: Լեոն, սակայն, զանց առնելով այս տեղեկությունը և հիմք ընդունելով 1724 թ. փետրվարի 1-ին Ղարաբաղից Իվան Կարապետի տված հաղորդումը, որտեղ ասված է, թե «Вахтангов сын своих людей 30 человек (послал) к Большим Армянам»¹⁷, եզրակացնում է, որ Դավիթ-բեկը՝ հենց այդ 30 մարդկանց մեջ էր և, որ նա միայն Սյունիք մտնելուց հետո է տեղում 400 մարդ հավաքագրել¹⁸:

14 Տե՛ս Լեոն. Երկերի ժողովածու (տասը հատորով), Հայոց պատմություն, հ. 3, գիրք 2. Երևան, 1973 (այսուհետև՝ Լեոն, հ. 3, գիրք 2), էջ 180—181: Ա. Գ. Աբրահամյան. Մի էջ Անդրկովկասի ժողովուրդների և հայ-ռուսական հարաբերությունների պատմությունից. Երևան, 1953, էջ 80—81: АРО, т. II, ч. I, с. LV. Армянское войско в XVIII в.: из истории армяно-русского военного содружества (исследование и документы). Подготовил к изданию А. Н. Хачатрян. Ереван, 1968, с. 70. Վ. Մ. Մարտիրոսյան. Հայ և վրաց ժողովուրդների համագործակցությունը ազատագրական պայքարում. Երևան, 1971, էջ 110: 2. Ա. Կնյազյան. Ազատագրական պայքարը Դավիթ-բեկի գլխավորությամբ. Երևան, 1963, էջ 62: Ն. Ա. Գոնց. Դավիթ-բեկ և Տեր-Ավետիքի սերունդը, էջ 68:

15 Ղափանցուց պատմություն, Առաջաբան, էջ 72—76:

16 Դավիթ բեգ. Ընտիր պատմություն..., էջ 6. հմմտ. Համապատում, էջ 149:

17 Г. А. Эзов. Сношения Петра Великого с армянским народом. СПб. 1898, с. 366.

18 Տե՛ս Լեոն, հ. 3, գիրք 2, էջ 180—181:

Հետագայում իվան Կարապետը կրկին է իր նախորդ տեղեկությունը, ավելացնելով 'Իսմիթի անունը'¹⁹, որ և Ա. Գ. Աբրահամյանին թույլ է տվել գալ նույն եզրահանգմանը²⁰, Այս առումով նշենք միայն մեկ հանգամանք. «Պատմությունը» կառուցված է Ղափանի ապստամբության անմիջական մասնակիցների տեղեկությունների հիման վրա, և մենք որևէ հիմք չունենք դրանք ստորադասելու Սյունյաց ազատամարտի սկզբից մոտ մեկ և կես տարի անց՝ 1724 թ. հունվարին Ղարաբաղում հայտնված և նույն թվականի ապրիլին կարճ ժամանակով Ղափան անցած իվան Կարապետի հաղորդումներին: Ասենք միայն, որ երբ Շահումյանի նշած 20 հարյուրապետների կողքին, իվան Կարապետը հայտնում է Դավիթ-բեկի հետ միասին Սյունիք եկած 30 մարդկանց մասին, ապա հասկանալի է դառնում, որ նա նկատի է ունեցել զորահրամանատարներին և ոչ թե շարքային զինվորներին: Նկատառման է արժանի, որ 20 հարյուրապետների մի մասը հիշվում է հականե-հանվանե (ՊՄԾ, էջ 121, հմմտ. Զորացուցակ, էջ 143): Սա նույնպես հուշում է, որ խոսքը զորահրամանատարների մասին է՝ հասարակ զինվորների անունները դժվար թե հիշատակվեն:

Ա. Գ. Աբրահամյանը, սակայն, չի բավարարվել միայն իվան Կարապետի տեղեկությունները բերելով: Նա գրում է. «Հայկական ՍՍՌ Պետական մատենադարանի № 2888 ձեռագիրը, որը պարունակում է Հ. Մելիք-Սելիմյանցի «Համառոտ պատմություն Հայկազնեայց» աշխատությունը և ուր օգտագործված են Դավիթ-բեկի մասին մեզ անծանոթ աղբյուրներ ևս, Դավիթ-բեկին ուղեկցող մարդկանց թիվը հաշվում է 40 հոգի: Այնտեղ ասված է. «(Դավիթ Բէկ) ընդ իւր առեալ արս իբրեւ քառասուն...»²¹: Այսպիսով, հաստատվում է Դավիթ-բեկի պատմիչի այն տեղեկությունը, որ Դավիթ-բեկը... Սյունիք է գնացել իր 30—40 հետևորդների հետ միասին»²²:

Նախ նշենք, որ և՛ Ա. Գուլամիրյանցի տպագրում, և՛ վենետիկյան երեք բնագրերում չկա որևիցե տվյալ այն մասին, թե իբր Դավիթ-բեկը Սյունիք է ժամանել «իր 30—40 հետևորդների հետ»:

Ինչ վերաբերում է Հ. Մելիք-Սելիմյանցի վերոհիշյալ «աշխատությանը», ապա յուրաքանչյուր պատմաբան, թերթիկով այդ ձեռագիրը, կարող է ասել, որ դա Մ. Զամչյանի «Հայոց պատմության» պարզ վերաշարադրությունն է և ոչ ավելին: Ինչպես և պետք էր սպասել, Հ. Մելիք-Սելիմյանցի «հաղորդումը» վերցված է ոչ թե «անծանոթ» աղբյուրից, այլ Զամչյանի երկից: Մ. Զամչյանը գրում է. «Ապա հրամանաւ (վրաց) իշխանին առեալ Դաւթի ընդ իւր ի հայոց եղելոց ի վրաստան արս իբր քառասուն՝ եկն ի Սիսական գաւառ, այն է Սիսան. և բանակեցաւ ի դաշտավայրն կոչեցեալ Երեք գագաթ, և յայլազգեաց՝ Իւշ Թէփէ. և եհար անդ զայլազգիս՝ որք կոչէին Քարա շօղու: Եկեալ անդի յաւանն Շահեր՝ որ էր ի ձեռս Հայոց, կոչեաց զառաջնորդն Տաթևու, և յայտնեաց նմա, թէ յինչ իրաց պէտս եկեալ իցէ ինքն. և ձեռամբ նորա ազդ արար հայոց բնակելոց ի Սիւնիս: Եւ նոքա իբրեւ գիտացին զայս՝ ուրախ եղեն, և վաղվաղակի ժողովեցան առ նա արք շորեքհարիւր՝ ամենեքին զօրաւորք...»²³:

Նախքան վերոբերյալ մեջբերումի բուն քննությանն անցնելը, պետք է ասել, որ Զամչյանի «Հայոց պատմության» Դավիթ-բեկի ապստամբությանը վերաբերող երկու գլուխները, գրեթե ամբողջությամբ, Համապատումի երբեմն վերախմբագրում դարձող վերաշարադրանքն են²⁴: Համապատումի օգ-

¹⁹ Армяно-русские отношения в 1-ой трети XVIII в., сборник документов, т. II, ч. II, ред. Аш. Иоанисян, Ереван, 1967 (այսուհետև՝ АРО, т. II, ч. II), док. № 277, с. 184.

²⁰ Ա. Գ. Աբրահամյան. Մի էջ..., էջ 80—81, նույնի՝ Սյունիքի XVIII դարի ազատագրական շարժման պատմության շուրջ, էջ 169:

²¹ Մաշտոցի անվ. Մատենադարան, ձեռ. № 2888, էջ 334ր:

²² Ա. Գ. Աբրահամյան. Մի էջ..., էջ 81:

²³ Մի քայլ էլ Զամչյանց. Հայոց պատմություն. հ. Գ, Երևան, 1984, էջ 785:

²⁴ Նույն տեղում, գլուխ ԽԸ և ԽԹ, էջ 784—800. հմմտ. Պատմություն Ղափանցուց, Առա-

տագործման Չամչյանի սկզբունքը պատկերացնելու համար լիովին բավական է անդրադառնալ նրա մի շարք թվային շտկումներին:

Բարգուշատի եղերական արշավանքի մասին խոսելիս Համապատումը հստակ չի նշում Թորոսի բանակի թվաքանակը, հայտնելով միայն, որ Ֆաթհ-Ալի սուլթանի և նրա եղբոր զորքը «կրկնապատիկ եւ եռապատիկ, եւ առանել եւս» էր՝ «իբրու ութ եւ տասն հազարաւ» (Համապատում, էջ 158): Չամչյանը խմբագրել է այս տեղեկությունը. որպես հիմք է ընդունել թշնամու 18 հազարանոց բանակի «եռապատիկ» առավելությունը և, այս դեպքում, ճիշտ հաշվել Թորոսի զինվորների քանակը՝ «իբր վեցհազարօք»²⁵, Բայց այստեղ էականն այն է, որ աղբյուրի նկատմամբ Չամչյանի վերաբերմունքը տրամաբանական լինելով հանդերձ, խստիվ այնքան էլ ճշգրիտ չէ (որպես ելակետ ընդունելով թշնամու զորքի «կրկնապատիկ» առավելությունը, Չամչյանը կատանար 9 000 հայ զինվոր (18 000 : 2 = 9000), իսկ եռապատիկից ճառանել եւս»-ը՝ 6 000-ից պակաս հայ զինվոր): Ըստ երևույթին, ինքն էլ ճշգրիտ չի համարել իր հաշվարկը, այդ պատճառով էլ Թորոսի բանակի կորուստները հաշվել է աւելի քան զերիս հազարաւ²⁶, և ոչ թե 4 600 հոգի, որ պետք է հետևեցնեն Համապատումի համապատասխան հաղորդումից, ուր ասված է, թե «զերծեալքն ի նոցանէ (իմա՝ 6 հազարից) միայն հազար շորս հարիւր այր եկին ի Չավնդուր» (Համապատում, էջ 158):

Հալիձորի պաշտպանության առաջին վեց օրերին երկու կողմերի տված կորուստների մասին Համապատումում կարդում ենք. «...եւ զաւուրս վեց մարտ եղեալ ընդ միմեանս կռուէին. եւ ի կողմանցն հակառակաց (իմա՝ օսմանյան բանակից) յաւուրն հարիւր, կամ երկու հարիւր, եւ երբեմն երեք կամ չորս հարիւր անկանէին. եւ ի սոցանէ (իմա՝ Հալիձորի պաշտպաններից) — Ա. Ա.) հազիւ մի ոք կամ երկու՝ վասն ամրութեան տեղոյն» (Համապատում, էջ 168): Այս հատվածը Չամչյանը խմբագրում է այսպես. «...և կարգ եղեալ շուրջանակի պատերազմէին... զաւուրս վեց: Իսկ որք ի ներքո էին՝ զգուշութեամբ և անձայն մարտնչէին. որով և անկանէին յայլազգեաց անտի յաւուրն իբր երեքհարիւր անձիք անելի կամ պակաս. իսկ յամրականացն անկան յայն վեց աւուրն իբր ոգիք ութն»²⁷:

Ինչպես տեսնում ենք, թվային տվյալները շատ են որոշակիացված, ընդ որում կիրառված է խմբագրական նույն եղանակը, որը կարելի է բնորոշել տրամաբանական-կիսակամայական եզրահանգում անունով: Մրա տրամաբանական կողմն արտահայտված է նրանում, որ Չամչյանը փորձում է տալ Համապատումից իրեն հայտնի ծայրային թվերի միջինը. մի դեպքում դրանք 100 և 400 թվերն են (օսմանյան բանակի տարբեր օրերին տված զոհերը տատանվում են սրանց միջև), որոնց միջինը Չամչյանը ընդունել է 300-ը: Մյուս դեպքում ծայրային թվերը 7-ը և 11-ն են²⁸. սրանց միջինն էլ համարել է 8-ը:

շարան, էջ 71—72: Միաժամանակ, Չամչյանի երկի խնդրո առարկա հատվածում նկատվում են ինչ-որ ուրիշ, ըստ երևույթին բանավոր աղբյուրից քաղված երկու ավանդապատումանման դրվագ՝ մատակ ձիերի օգնությամբ ձեռնարկված գրոհի և Մարաղայի ճակատամարտի որոշ մանրամասնությունների մասին (նույն տեղում, էջ 796²¹—797¹³, 797⁴²—798¹³): Այս դրվագները, սակայն, ավարտուն ավանդական զրույցի տեսք չեն և հենց այդպես էլ մտցված են ընդհանուր շարադրանքի մեջ: Մյուս բոլոր դեպքերում Չամչյանի բնագիրը Համապատումի վերաշարադրությունն ու խմբագրումն է:

²⁵ Մի քաջ եւ Չամչյանց. նշվ. աշխ., էջ 788: Չամչյանը ծանոթ չի եղել Ս. Շահաբյանի և Տեր-Ավետիքի պատումներին (տե՛ս Պատմութիւն Ղափանցոց, Առաջաբան, էջ 69), հետևապես նա չէր կարող օգտվել Ս. Շահաբյանի այդ առթիվ արված հաղորդումից (ՊՄՇ, էջ 124):

²⁶ Մի քաջ եւ Չամչյանց. նշվ. աշխ., էջ 788:

²⁷ Նույն տեղում, էջ 794:

²⁸ Համապատումն ասում է, որ 6 օրվա ընթացքում Դավիթ-բեկի զինվորներից ընկել են «հազիւ մի ոք կամ երկու», այսինքն՝ եղել է առնվազն մեկ օր, երբ ընկել են երկու զինվոր (Հեթե ընդամենու լինենք, որ մյուս 5 օրերի ընթացքում զոհվել է օրական մի զինվոր), այդ-

Եղանակի կիսականայական դրսևորումն արտահայտված է նրանում, որ նշված ծայրային թվերի ճշգրիտ միջին թվաբանականները կլինեն 250-ը (ոչ 300-ը) և 9-ը (ոչ 8-ը): Դժվար չէ նկատել, որ առաջին դեպքում Չամչյանը փոքր-ինչ մեծացրել է օսմանցիների զոհերի միջին քանակը, իսկ երկրորդ դեպքում՝ փոքր-ինչ նվազեցրել է Հալիձորի պաշտպանների կորուստների միջինը: Այս երևույթը, թերևս, բացատրելի է Դավիթ-բեկի զինվորներին էլ ավելի քաջ ու աննկուն ներկայացնելու ցանկությամբ: Սիսիական, ճշմարտության հանդեպ Չամչյանն ընդհանուր առմամբ չի մեղանշում: Խմբադրական այս եղանակի կամայականությունն իր սահմաններն ունի՝ առաջանում է միայն այն դեպքերում, երբ աղբյուրը որոշակի պատմական փաստի վերաբերյալ ունի ոչ հստակ, հավանական տարբեր մոտեցումներ հանդուրժող տվյալներ: Այս սահմանների գոյությունն էլ մեզ թելադրեց եղանակն անվանել ոչ թե տրամաբանական-կամայական, այլ տրամաբանական-կիսական: Կամայական²⁹: Հիշենք, որ այս եղանակով Լուսառնորդվել նաև Ղ. Սեբաստացին՝ Նախիջևան գետի վրա տեղի ունեցած ճակատամարտում հայոց զորքի կորուստների թիվը որոշելիս:

Եղանակի էությունը ցայտուն երևում է Չամչյանի խմբագրական մեկ այլ միջամտության մեջ ևս: Խոսելով Ուզունբենդ կիրճում թուրքական զորքերի ջարդի մասին, Համապատումը նշում է, որ «էր կիրճն այն երկայն՝ ձգեալ իբրու գնացս միայն ժամու կամ երկուց» (Համապատում, էջ 172): Չամչյանը սա դարձրել է. «էր կիրճ անցիցն երկայն ձգեալ իբրու գնացս ժամու և կիսայն»³⁰: Մեկնաբանությունները, թերևս, ավելորդ են:

Դավիթ-բեկի Սյունիք մտնելու մասին Չամչյանից քաղված վերոբերյալ ընդարձակ հատվածը, անտարակույս, Համապատումի համապատասխան մասի հիման վրա հեղինակի արած վերաշարադրանքն է (Համապատում, էջ 149¹⁸—էջ 150²³): Իսկ զինվորների 40 թիվը՝ տրամաբանական-կիսական-յական եզրահանգման եղանակով Համապատումի վերախմբագրման արդյունք է: Պարզաբանենք:

Համապատումի սահմանագծված հատվածում նկարագրված են Ուլթեփեհում Դավիթ-բեկի մղած երկու հաղթական մարտերը. առաջինը՝ Ղարաշուլունների, երկրորդը՝ Ջիվանշիրների դեմ: Առաջին մարտին մասնակցած՝ Դավիթ-բեկի զինվորների քանակը որոշակի նշված չէ, բայց միանգամայն կուհեղ է, որ դրանք նրա հետ եկած 400 վիրահայերն են. «Իբրեւ ելանէր յերկրէն Վրաց, առ նա ժողովէին... արք իբրեւ շորեք հարիւր» (Համապատում, էջ 149): Թեև երկրորդ մարտից առաջ Դավիթ-բեկը ժողովել էր «առ ինքն զարսն Շահերու» (Համապատում, էջ 150), սակայն այս անգամ ևս նա դուրս է գալիս 400 մարտիկներով: Հենց այս փաստն էլ թյուրիմացության մեջ է զցել Չամչյանին, քանի որ, ըստ տրամաբանության, Դավիթ-բեկի ջոկատի և շահերցիների միացումից հետո հայկական զորագունդը պետք է Ջիվանշիրների դեմ դուրս գալիս ունենար 400-ից ավելի մարտիկ: Արդ, Չամչյանը մակաբերել է, որ Ղարաշուլունների հետ կռվելիս Դավիթ-բեկի տրամադրության տակ եղել է 400-ից պակաս զինվոր, իսկ 400-ի մեծ մասը եղել են Շահերում հավաքագրվածները: Ահա այստեղ էլ՝ Դավիթ-բեկի հետ սկզբնապես եղած ռազմիկների թիվը որոշելու համար գործի է դրվել տրամաբանական-կիսականայական եզրահանգման եղանակը: Թվում է, պատահական չէ 400-ի և 40-ի թվաբանական «ազգակցությունը» (մեկ զրոյի տարբերությունը). հավանաբար, ընդունելով, որ եկվոր 1 ռազմիկին Շահերում պետք է

պիսով՝ զոհված զինվորների նվազագույն հնարավոր քանակը 7-ն է: Եվ հակառակը. եղել է առնվազն մեկ օր, երբ զոհվել է մի զինվոր (եթե ընդունելու լինենք, որ մյուս 5 օրերի ընթացքում ընկել են օրական երկու զինվոր), այդպիսով՝ զոհված զինվորների հնարավոր առավելագույն քանակը 11-ն է:

²⁹ Ըստ էության, այս երևույթը հատուկ էր ոչ միջնադարի պատմագիտությանն ընդհանրապես:

³⁰ Մի քայլ էլ Չամչյանից. նշվ. աշխ., էջ 796:

գումարվելին 10-ը հավաքագրվածներ, Չամչյանը հայտնի 400-ից արել է տասնապատիկ նվազեցում և ստացել 40:

Իրականում, Ջիվանշիրների դեմ կոչվում Դավիթ-բեկը դարձյալ օգտագործել է Վրաստանից իր հետ Շնհեր հասած 400 հավատարիմ, փորձված և լավ զինված մարտիկներին (2 000-անոց ջոկատից մնացածներին) և այդ երեքօրյա գոտեմարտի առաջին գրոհը ձեռնարկել է նրանց հետ միասին: Իսկ Շնհերի զինական ուժը, ըստ երևույթին, կատարել է օժանդակ կամ, որ առավել հավանական է, պահեստային ուժի դեր և ավելի ուշ է մտել մարտի մեջ: Այս դրվագի մասին Տեր-Ավետիքի պատմածի (Համապատումի խնդրո առարկա հատվածի հիմքի) մեջ զգացվում է Ջիվանշիրների դեմ մղված մարտի առաջին գրոհին մասնակցած 400 զինվորների և Դավիթ-բեկի տրամադրության տակ տակ եղած տեղական զորքի տարբերությունը. «Իսկ նորա (Դավիթ-բեկը) եւս ժողովեալ առ ինքն զարսն Շնհերու, ել ընդ առաջ եռցա ի յիջդէփէ, եւ անտի ետես զգօրս թշնամեացն իբրեւ զվեշտասան հազարս, եւ ընդ ինքեան առեալ զարս սպառազէնս 400, յուսացեալ յԱստուած՝ գոչեցին առ նա, եւ հարեալ ի դիմի նոցա յաւուրս երիս՝ խորտակեցին զնոսա» (ՊՏԱ, էջ 131):

Որ այդ շորս հարյուրը շնհերցիները չէին, երևում է նաև «Պատմության» Զորացուցակից, ուր ասված է, որ Շնհերի զորաշեկատում կար 550 ռազմիկ (Զորացուցակ, էջ 143):

Դավիթ-բեկի հետ Սյունիք մտած զորաշեկատի մեծաքանակ լինելու մասին հուշում է նաև այն, որ Նախիջևանի խանը շտապեց իր 12 հազարանոց զորքով անձամբ արշավել նրա դեմ:

Վերջապես, Վրաստանից եկած հայոց զորաբանակի թվաքանակի մասին Ս. Շահումյանի և Տեր-Ավետիքի տված հստակ տեղեկությունները, ինչպես տեսանք, ոչ միայն չեն հակասում, այլ ընդհակառակը՝ լրացնում են միմյանց:

* * *

Այժմ քննենք Դավիթ-բեկի մուտքը Ղափան ըստ Համապատում բնագրի. «[Վրաց իշխան Շահնավազը] կոչեալ զԴաւիթ Պէկն... ետ նմա զիշխանութիւն երթալ յաշխարհն Սիւնեաց, որ այժմ կոչի Ղափան... ել նա յերեսաց իշխանիս Վրաց, եւ եկն էհաս յաշխարհն Սիւնեաց... և բանակեցաւ ի սանմանս Սիսան գաւառին, ի գեղեցիկ դաշտավայրն յայն Երեքգագաթեան, որ ի յայլասեռից կոչի Իւլթէփէ» (Համապատում, էջ 149):

Այդ Հովհաննիսյանը, քննության առնելով «Ղափան» տեղանունը և մատնանշելով նրա բազմանշանակությունը ուշ միջնադարում, ցույց է տալիս, որ այն, երբեմն, իր լայնիմաստ կիրառությամբ ներառում էր նույնիսկ Կուր և Արաքս գետահովիտների միջև ընկած ամբողջ լեռնաշխարհը³¹:

Նկատի ունենալով XVII—XVIII դդ. մի շարք հաղորդումներ, նա գրում է. «Ղափան անունը հին աղբյուրներում գործ էր ածվում լայն իմաստով, ընդգրկելով նաև Սիսիանը»³²: Պետք է նշենք, սակայն, որ նույն ժամանակաշրջանի որոշ վավերագրերում Սիսիան գավառն, այդուամենայնիվ, պարզորոշ կերպով զատվում էր բուն Ղափանից: Այսպես, Իսրայել Օրին, 1699 թ. սեպտեմբերի 22-ին Պֆալցի կուրֆյուրստին ուղղված իր զեկուցագրում Արեւիկյան Հայաստանի 18 նահանգների ռազմական ուժերը թվարկելիս առանձին է նշում «Մեծ Ղափանը (ուր կա յոթը գավառապետություն)» և «Սիսիանի նահանգը»³³: Ղարաբաղի կաթողիկոսները³⁴ և մելիքները, 1725 թ. հուլիսի 25-ին Եկատերինա կայսրուհուն հղված նամակում, հայկական ապստամբ ճերկրները նշելիս, Ղափանը և Սիսիանը կրկին տարբերանշում են³⁵: Ինչպես տեսանք, Ս. Շահումյանը նույնպես զանազանում էր Ղափանը Սիսիանից:

³¹ Ա. Մ. Հովհաննիսյան, Դավազներ... գ. II, էջ 230—233:

³² Նույն տեղում, էջ 232:

³³ Տե՛ս Գ. Ա. Эзов. Указ. соч., т. 35—36. Հմմտ. 1 և 2, հ. 3, գիրք 2, էջ 56:

³⁴ Քանձասարի կաթողիկոս Եսայի Հասան-Ջալալյանը և Երեց մանկանց կաթողիկոս Ներսեսը:

³⁵ АРО, т. II, ч. II, док. № 315, 316, с. 249, 252:

Հասկանալի է, որեմն, որ «Ղափան» տեղանունը, բացի «Սյունյաց աշխարհի» հոմանիշը լինելուց³⁶, միաժամանակ գործածվել է նաև ավելի նեղ իմաստով։ Այս իրողությունն է, որ իր լրատուների պատմածները համադրելիս Ղ. Սեբաստացին հաշվի չի առել և Դավիթ-բեկի մուտքը Սյունիք նույնացրել է նրա՝ բուն Ղափան մտնելու հետ։

Հայտնի է, որ Ղ. Սեբաստացին զբաղվել է նաև Հայաստանի պատմական աշխարհագրությամբ և քարտեզագրությամբ³⁷։ Նրա պահպանված անտիպ աշխատությունները նկարագրել է Ս. Արամյանը³⁸։ Դրանցից առավել արժեքավոր են՝ ա. «Երկրորդ տետրակ աշխարհագրութեան (Աշխարհագրական բառարան)» ուսումնասիրությունը, որի 45—48 էջերում նկարագրված են «Երկրորդայք, աւանք և ոմանք եւս գիւղորայք երկրին հափանու, Զավնդու եւ Դողթանայք»³⁹, բ. շուրջ 480 էջանոց «Համառօտ պատմութիւն թագաւորացն Հայոց և աշխարհագրութիւն Հայաստանի և աշխարհագրական բառարանը»։ Ղ. Սեբաստացին պատմաաշխարհագրական աշխատանք ձեռնարկող առաջին մխիթարյանն էր։ Յճա այս հատուկ հետաքրքրությունն է պատճառը, որ Համապատգմի միտքերով հատվածում արձանագրվել է նախնական պատմականների մեջ բացակայող պատմաաշխարհագրական այսպիսի մի փաստ։ Ուշթեփեն գտնվում է «ի սահմանս Սիսան գաւառի»։ Ամենայն հավանականությամբ, այս տեղեկությունը քաղված է նրա պատմաաշխարհագրական հետադոտություններից կամ սրանց սեպագրություններից։

Ե. վ. Փեղիկյանը տպագրել է Սեբաստացու «Համառօտ պատմութիւն թագաւորացն Հայոց» անտիպ աշխատության մի հատված⁴⁰, որի մեջ հետաքրքրող մասը հետևյալն է. «Դարձեալ գաւառն հարան որ և Հարանդ ասի, թէպէտ այժմ ընդարձակապէս առեալ ունի և զԳուրհամ, զԶավնդուր և զայլ գաւառս Սիւնեաց աշխարհին, ևսկայն յառկապէս ունի զՓոքր Սիւնիս և զՀալիձուր ուր բնակէր Դաւիթ Պէկն ի մտանելն նորա ի հարան...»⁴¹։ Հատուկ Դավիթ-բեկի «Պատմութիւն» համար Սեբաստացին պատրաստել է նաև մի քարտեզ⁴², որը տպագրել է Ս. Արամյանը⁴³։ Այստեղ Փոքր Սյունիքը տեղադրված է «Հալիձուր» (իմա՝ Ողջի) և «Զավնդուր» (իմա՝ Մամ կամ Բասուտ. վերին հոսանքում կոչվում է նաև Շիշկերտ, ստորին հոսանքում՝ հալին կամ Շիկահող) գետերի միջև։ Հալիձուրը նշված է նույն գավառի մեջ։ Եթե նույնիսկ ընդունենք, որ Փոքր Սյունիքը ավելի լայն տարածք է ընդգրկել, միևնույն է՝ քարտեզից ակնհայտ է, որ Սիսիանը մտցված չէ նրա մեջ։ Փոքր Սյունիքը տեղադրված է Կասպել (Գազուլլ, այժմ՝ Արամազդ) լեռնազանգվածից հարավ։ Ուշագրավ է, որ Սիսիան գավառը, նրա խոշորագույն գյուղերը՝ Բռնակոթը և Անգեղակոթը⁴⁴, ինչպես նաև Սիսիան ավանը, քարտեզի վրա ընդհանրապես նշված չեն։

Ամփոփենք շարադրվածը։ Սյունյաց ապստամբության առաջին դրվագները Ս. Շահումյանի և Տեր-Ավետիքի պատումներում զուգընթաց չեն. առաջինը շարադրում է Սիսիանում և նախիջևան գետի վրա տեղի ունեցածը, իսկ

36 Սիսան արքեպիսկոպոս Փերվազյանը 1722 թ. մի առիթով գրում էր. «...հափրեստանն, որ է տուն Սունեաց...» (տե՛ս АРО, т. II, ч. II, док. № 169, с. 18. հմմտ. ՊՏԱ, էջ 136. Համապատում, էջ 149)։

37 Տե՛ս Սահակ Զեմճեմյան. Հ. Ղուկաս Սեբաստացի (1709—1752) հեղինակ Դավիթ բեկի պատմութեան.—«Բազմավեպ», ԶԼ, 1972, № 4, էջ 491—501։

38 Տե՛ս Պատմութիւն Ղափանցւոց, էջ 188—193։

39 Նույն տեղում, էջ 190։

40 Տե՛ս Ե. վ. Փեղիկյան. «Դաւիթ Բէկի» պատմական աղբյուրները և Մխիթարյանը.—«Բազմավեպ», ՂԶ, 1938, № 6—9, էջ 172—187։

41 Տե՛ս Ե. վ. Փեղիկյան. նշվ. աշխ., էջ 175։

42 Պատմութիւն Ղափանցւոց, Առաջաբան, էջ 67։

43 Քարտեզը տե՛ս նույն տեղում, 49-րդ էջից առաջ՝ ներդիրում։

44 Ա. Հ. Հովհաննիսյան. Դրվագներ..., գ. II, էջ 313—314։

երկրորդը պատումն սկսում է ավելի ուշ կայացած՝ Ծռաբլրի (Ուշթեփեի) ընդհարումից: Համապատումը կազմելիս Ղ. Սեբաստացին թյուրիմացաբար աղավաղել է Դավիթ-բեկի մուտքի վերաբերյալ նախնական պատումների հավաստի տեղեկությունները. շփոթի հիմնապատճառը եղել է Ղափան տեղանվան բազմանշանակությունը:

* * *

Վերջնականապես հաստատելու համար նախնական բնագրերի վերն արժարժված տվյալների նույնացման և միահյուսման սխալականությունը, քրննենք Տեր-Ավետիքի պատումում հիշատակվող՝ նախիջևանի խանի զորքի հետ Դավիթ-բեկի նոր բախման հարցը և այն, թե ինչու՞ է այդ դեպքի մասին ոչինչ չի հաղորդում Ս. Շահումյանը:

Տեր-Ավետիքի համաձայն, դեպքերն ունեցել են այսպիսի հաջորդակա-նություն. հայոց զորքերը գրավել են Զևու, այնուհետև՝ Որոտան բերդերը: Այդ գործողություններից անմիջապես հետո՝ հայկական մի սովար դորա-բանակ արշավել է Բարգուշատի դեմ, իսկ նախիջևանի խանը, օգտվելով այդ բանգամանքից, 14 հազարանոց զորքով⁴⁵ հարձակվել է Սիսիանում գտնվող Դավիթ-բեկի վրա⁴⁶:

Զևուի առումը հիշվում է նաև Ս. Շահումյանի պատումում (ՊՄՇ, էջ 124): Բայց այստեղ անցքերի հաջորդականությունն այլ է. Զևուի գրավումից հետո Չավնդուրի հայոց զորքերի գլխավոր հրամանատար Թորոս-բեկը գծովում է Դավիթ-բեկի հետ և վերադառնում Չավնդուր: Միևնույն ժամա-նակ Կենավուզ է վերադառնում Պապ զորավարը (ՊՄՇ, էջ 124. հմմտ. Հա-մապատում, էջ 157): Վերջինիս հետ պիտի լինեն և Ս. Շահումյանը, որը Պապի «տեղական» էր (Զորացուցակ, էջ 143. հմմտ. Համապատում, էջ 161): Այնուհետև անմիջապես հետևում է Թորոսի 6 հազարանոց նորահավաք զո-րաբանակի արշավանքը Բարգուշատի Ֆաթհ-Ալի սուլթանի դեմ, և այդ զորքի եղբրական վախճանը մելիք Ֆուանկյուլի դավաճանության պատճառով. «Եւ կոտորեցին զզօրսն Թորոսի, եւ զԹորոս սպանին և ի վեց հազարացն՝ միայն հազար շորս հարյուր մարդ զերծաւ, եւ այլքն մեռան» (ՊՄՇ, էջ 124—125): Այսպիսով, Ս. Շահումյանը, ի տարբերություն Տեր-Ավետիքի, Զևուի առումից հետո նշում է ոչ թե Որոտան բերդի գրավումը և նախիջևանի խանի հետ Դավիթ-բեկի նոր բախումը, այլ՝ Թորոսի արշավանքը Բարգուշատի դեմ: Հաշվի առնելով Տեր-Ավետիքի ժանուցումն առ այն, որ նախիջևանի խանի հարձակումը տեղի է ունեցել այն պահին, երբ Ղափանի հայոց զորքերի մի մասն արշավել էր Բարգուշատի վրա (ՊՏԱ, էջ 133—134), կարելի է մակա-բերել, որ մի կողմից Թորոսի ռազմագլուխը սուրավ, մյուս կողմից, Որոտնա բերդի գրավումն ու նախիջևանի խանի հաճախումը եղել են միաժամանակ:

Այս եզրակացության համար ունենք նաև լրացուցիչ հիմքեր. 1) Ղ. Սեբաստացին Չավնդուրի զորաբանակի կործանումը նշում է 1724 թ.՝ «յամի երրորդի՝ յետ գալստեանն Դաւթի ի Ղափան (Համապատում էջ 157): Որոտնա բերդի գրավումը, որին անմիջապես հաջորդում է Դավիթ-բեկի նոր ընդհարումը նախիջևանի խանի հետ (Տե՛ս ՊՏԱ, էջ 133—134),

⁴⁵ Ս. Շահումյանի տվյալներով, 1722 թ. նախիջևանի խանի զորքի թիվը կազմում էր 12 000 մարդ (տե՛ս ՊՄՇ, էջ 121): Տեր-Ավետիքի նշած 14 000 թիվը վերաբերում է 1724 թ. (Որոտնա բերդի գրավումը, որին անմիջապես հետևել է նախիջևանի խանի արշավանքը, եղել է «ի յամին երրորդի, յետ գալստեանն իւրոյ (Դավիթ-բեկի—Ա. Ա.) ի Ղափան», տե՛ս Համա-պատում, էջ 153): Երկու պատումների կողմից գրեթե նույն թվի հաղորդումը կարող է 1722—1724 թթ. նախիջևանի խանի տրամադրության տակ գտնվող մշտական զորաբանակի արժանա-հավատ թվաքանակ համարվել:

⁴⁶ ՊՏԱ, էջ 133—134: Տեր-Ավետիքի պատումում «Զևու» անունը չի հիշատակված, նշված է միայն գրավված բերդի տիրակալի անունը՝ Ասլամազ Դուլի, ինչն էլ թույլ է տվել Ղ. Սեբաս-տացուն, Ս. Շահումյանի պատմաի համապատասխան դրվագի («...ժողովեցան Թորոսն ի Զևու բերդն, որոց գլուխն էր Ասլամազ Պէկն», ՊՄՇ, էջ 124) հետ համադրելուց հետո, ճիշտ կոա-հել բերդի անունը (տե՛ս Համապատում, էջ 153):

նույնպես տեղի է ունենում «ի յամին երրորդի, յետ գալստեանն իւրոյ ի Ղափան» (Համապատում, էջ 153):

2) Նախնական պատումների բնագրագիտական քննության ընթացքում Ս. Աբրահամյանը նկատում է, որ պատումների հեղինակները (Ս. Շահումյանը և Տեր-Ավետիքը), առհասարակ, ավելի ուշադրություն են դարձրել այն մարտերին, որոնց անձամբ մասնակցել են⁴⁷:

Զավնդուրի ցնցող իրադարձությունները (մանրամասն շարադրանքը հուշում է Ս. Շահումյանի մասնակցությունը կամ դրանց մոտիկից հետևած լինելը) և Դավիթ-բեկի զորքի մեջ գտնված չլինելը բացատրում են, թե ինչու է Ս. Շահումյանն աչքաթող արել Ղափանի հյուսիսում տեղի ունեցած կարևոր անցքերը՝ Որոտնա բերդի առումը և Նախիջևանի խանի հետ Դավթի զորքի նոր բախումը:

3) Խնդրո առարկա հարցն առավել պարզաբանելուն օժանդակում է Համապատումի մի այլ տեղեկություն ևս. «Եւ ի յամին երրորդի, յետ գալստեանն իւրոյ ի Ղափան, երթայ պաշարէ զմեծ եւ զանառիկ բերդն Որոտնու, եւ ի տօնի Սաղկազարդին, որ շորորդ օր էր պաշարման բերդին, եղև անձրեւ յոյժ, ով սքանչեւեցս, եւ ի սաստկութենէ անձրեւին՝ մի կողմն պարսպին ինքնին անկաւ. սոքա իբրեւ զայն տեսին՝ ձայն ետուն, խրախոյս բարձին, ի վերայ յարձակեցան եւ մտին ի ներքս, եւ հարին կոտորեցին զամենայն այլազգիս, եւ առին զբերդն» (Համապատում, էջ 153, հմմտ. ՊՏԱ, էջ 133):

Ա. Գ. Աբրահամյանը, վերոբերյալ հատվածի հիման վրա տոմարական հաշվումներ է արել և պարզել Որոտնա բերդի գրավման ոչ միայն թվականը, այլև ամիսն ու ամսաթիվը՝ 1724 թ. մարտի 29-ը⁴⁸:

Կարելի է արդյոք վստահելի համարել Որոտանի գրավումից տարիներ անց Տեր-Ավետիքի վերհիշած այսպիսի մանրակրկիտ տեղեկությունը, մասնավորապես՝ Սաղկազարդի տոնի հիշատակումը: Այս սկզբունքային հարցին պատասխանելու համար մասնագետներին հայտնի վավերագրերից քաղենք հետևյալ հատվածները.

Պետրոս I-ի պատվիրակ Իվան Կարապետը 1724 թ. ապրիլի 4-ին Ղարաբաղից գրել է. «Եւ էս խայերին մէջտեղն Քուրդ կայ: էս խայերն ասում ան, թէ Զատիկն առենք՝ երեքշապաթ կամ շորեքշապաթ օր կուգնանք Քուրտին վերէն. քուրտն փշացնէնք, որ տեղէս մինչի Երևան ողջ խայեր ան՝ Ա (1) կուտառնան»⁴⁹: 1724 թ. ապրիլի 9-ին նույն պատվիրակը հաղորդում է. «Եսայերն էսօր գնացին... Ղափան... Աստուծով... ես էլ գէ դնում Ղափան»⁵⁰:

Ղափան մեկնելուց և վերադառնալուց հետո՝ 1724 թ. հուլիսի 18-ին Իվան Կարապետի գրած զեկուցագրում կարդում ենք. «...մեք ապրիլի ԺԵ (15)-ումն գնացինք Ղափան հայոց ղօշունօվն, շուն Ղափանայ գիր էր եկել, թէ Նախչվանալ խանըն և Բարգօշաաալ սուլթանըն եկել ին Ղափան, Հայոց ազգին շատ՝ Դ-նի (4—5000) ղօշում ին ջարթել, օղուուշաղ եսիր ին

47 Տե՛ս Պատմութիւն Ղափանցոց. Առաջարան, էջ 81—83:

48 Տե՛ս Ա. Գ. Աբրահամյան. Սյունիքի XVIII դարի ազատագրական շարժման պատմության շուրջ, էջ 171: Հաշվարկն ստույգ է: Բայց Ա. Աբրահամյանը սխալվում է՝ գրելով, որ Որոտանի ճակատամարտը տեղի է ունեցել «Դավիթ-բեկի և Ասլամաղ Ղուլի խանի զորքերի միջև» (Ա. Գ. Աբրահամյան. Սյունիքի XVIII դարի..., էջ 171): «Ղափանցվոց պատմության» բնագրերից և ոչ մեկում նշված չէ, թե Ասլամաղ Ղուլին «խոշոր զորաբանակ ուներ Որոտան բերդում» (տե՛ս նույն տեղում): Ս. Շահումյանը հայտնում է, որ Ասլամաղ-բեկը Զևու բերդի տիրակալն էր (տե՛ս ՊՄԵ, էջ 124): Ըստ Շահումյանի, Զևուի ամբողջ կայազորը ունյացվել է՝ «հարին սատակեցին զնոսալ... եւ ոչ մի ոք զերծաւ ի նոցանէ» (նույն տեղում): Պետք է ենթադրել, որ Ասլամաղ-բեկը սպանվածների մեջ էր: Համապատումն այս հարցում փոփոխություն չի մտցնում (տե՛ս Համապատում, էջ 152): Որոտնա բերդը գրավվել է ավելի ուշ, քան Զևուն (տե՛ս ՊՏԱ, էջ 133, հմմտ. Համապատում, էջ 152—153), հետևաբար նրա տիրակալի անունը մեզ անհայտ է մնում:

49 АРО, т. II, ч. II, док. № 239, с. 99:

50 Ա. Գ. Աբրահամյան. Մի էջ..., փաստ. № 45, էջ 204:

արարել՝ տարել... Եւ մեք ղօշունսով գնացինք Ղափան, տեսինք, որ հայէրն չարթովել ին և Քորդի ղօշունըն յետ ին դառցել, գնացել... Եւ մեր Հայոց ղօշունըն յետ արեկ և մեք մնացինք տեղն, որ գնինք ամենայն տեղ: Քէրդն և Բարգոշատայ սուլթանըն մեր ճանապարհըն կտրեցին... Եկինք հնձորիս անվանիս Ա(1) գէղ կէր, մեք եկինք տեղն ԲՃ (200) մարգով, թէ յեդ գանք: Քուրդն արէկ մեր վերէն... մեր փոքր ղօշունըն դուս գնաց Քէրդէրին գլխավորէրն չարթեցինք, բարի յեդ եկինք էլ Ղարաբաղ⁵¹,

Վերոգրյալ վավերագրերը տեղեկացնում են, որ 1724 թ. ապրիլի 4-ին Ղարաբաղի հայոց զինված ուժերն սկսում են Ղափան մեկնելու շտապ պատրաստութիւններ տեսնել, արշավի բուն պատճառը, սակայն, ժամանակավորապես թաքցնելով իվան Կարապետից, ինչն ինքնին հետաքրքրական է: Թեև Սղնախներում գտնվելու առաջին իսկ ամիսներից ուսաց արքունիքի պատվիրակը Ղափան (սՄեծ Խայեր) գնալու ցանկութիւն էր հայտնել⁵², և Թարխան յուզըրաշին պատրաստվում էր 2000 զինվորով ուղեկցել նրան⁵³, սակայն ապրիլի 9-ին, ապա և ապրիլի 15-ին Ղարաբաղյան երկու ղորաչոկատների անցումը Ղափան պայմանավորված էր բոլորովին այլ՝ արտակարգ հանգամանքներով. օգնութիւն խնդրագիր էր հասել Ղարաբաղ⁵⁴, որտեղ ասված էր, թե Բարգուշատի սուլթանի և Նախիջևանի խանի հարձակման պատճառով Ղափանում շափազանց ծանր կացութիւն է ստեղծվել⁵⁵:

⁵¹ APO, т. II, ч. II, док. № 277, с. 184—185:

⁵² Նույն տեղում, док. № 204, 205, 206, 210, 211, с. 61, 63, 65, 69, 71. հմտ. Ա. Ք. Աբրահամյան. Մի էջ..., փաստ. № 13, էջ 156:

⁵³ Տե՛ս Ա. Ք. Աբրահամյան. Մի էջ..., փաստ. № 34, 35, 47, էջ 187, 189, 207. հմտ. APO, т. II, ч. II, док. № 207, 252, с. 85, 114.

⁵⁴ Նույն 1724 թ. նոյեմբերի 5-ին Ռուսաստանի արտաքին գործերի կոլեգիայում Սղնախներից ժամանած Անտոն քահանան և Քյոխվա-Չալարին հայտարարում էին, որ Ղարաբաղից մինչև Ղափան՝ 3 օրվա ճանապարհ է (տե՛ս APO, т. II, ч. II, док. № 291, с. 205):

⁵⁵ Սղնախների Ղափան մեկնած օգնական զորքի թիվը սովորաբար համարում են 2000 զինվոր (տե՛ս APO, т. II, ч. I, с. LVII. Ա. Ք. Աբրահամյան. Սյունիքի XVIII դարի..., էջ 172): Եթե նկատի առնենք, որ 2000 զինվորներով նախատեսվում էր Ղափան անցնել այն ժամանակ, երբ ախտեղ կայուն իրավիճակ էր և հայ զինվորությունը երկրի լիդիան տերն էր, ապա ղափանցիների խոշոր պարտություններից հետո, Սղնախների օգնության արշաված զորքի թիվը, կարծում ենք, ավելի մեծ պիտի լիներ:

Հնարավոր է, որ 2000 մարտիկից էր բաղկացած 1724 թ. ապրիլի 15-ին իվան Կարապետի հետ Ղափան մեկնած երկրորդ զորաջոկատը: Հենվելով Աշ. Աբրահամյանի «Մի էջ Անդրկովկասի ժողովուրդների և հայ-ուսական հարաբերությունների պատմությունից» աշխատության 1724 թ. ապրիլի 15-ով թվագրված № 47 փաստաթղթի վրա, կարող էինք այս վարկածը հավանական համարել. փաստաթղթի մեջ ասված է. «Մին լել մարդ կայ, անումն Թարխան ալ, մեզ խամար 2000 ըռուրլի վեռէց (այսինքն՝ 2000 զինվոր պատրաստեց—Ա. Ա.—տե՛ս նույն տեղում, փաստ. № 35, էջ 189), լորի տեսնենք՝ արշանք խրիդ կառնենք, էլի ըռուրլի էնա: Սակայն այս նախադասությունը պատվիրակի 1724 թ. մարտի 10-ի զեկուցագրի վերջին նախադասության բառացի կրկնությունն է (տե՛ս նույն տեղում, փաստ. № 34, էջ 187), իսկ Աշ. Հովհաննիսյանի խմբագրությամբ ավելի ուշ լույս տեսած փաստաթղթերի ժողովածուում «Մի էջ...»-ի № 47 վավերագիրը, հավանաբար, վերստուգվելուց հետո, թվագրվել է ոչ թե ապրիլի 15-ով, այլ բավական առաձգական ժամանակով՝ 1724 թ. գարունով (տե՛ս APO, т. II, ч. II, док. № 252, с. 114): Այսպիսով, 1724 թ. ապրիլին Ղափան մեկնած սղնախցիների զորաբանակի թվաքանակի հարցը պետք է համարել լուծված: Մեկ այլ դիտարկում: 1724 թ. հուլիսի 18-ի զեկուցագրում իվան Կարապետը հիշատակում է Ղափանում իր հետ մնացած շոկատի թվաքանակը՝ 200 զինվոր, ինչը Աշ. Հովհաննիսյանը հնարավոր է համարում ուղղել 2000-ով (տե՛ս APO, т. II, ч. I, с. LVII). Բայց չէ՞ որ զեկուցագրում հստակորեն նշվում է, որ Սղնախների բանակի մեծ մասը տեսնելով, որ թշնամու զորքերը Ղափանից նահանջել են, ետ է վերադարձել. «Եւ մեր Հայոց ղօշունըն յետ արեկ և մեք մնացինք տեղն, որ գնինք ամենայն տեղ»: Ուստի Ղափանում ուսաց պատվիրակին ուղեկցելու նպատակով մնացած 200 զինվորների քանակը կասկածելի համարելը ճիշտ չէ:

Իվան Կարապետի հաղորդումները, ամբողջական առումով, համապատասխանում են «Ղափանցվոց պատմության» երեք բնագրերի հիման վրա սույն հոդվածում կատարված քննության եզրահանգումներին:

ա) Իվան Կարապետը վկայում է, որ Նախիջևանի խանի և Բարգուշատի սուլթանի զորքերը միաժամանակ են հարձակվել Ղափանի վրա: Կասկած չի մնում, որ Դավիթ-բեկի այդ երկու թշնամիները համաձայնեցրել էին իրենց գործողությունները:

բ) Ղափանի հայոց զորքի կորուստների մասին Իվան Կարապետի նշած թիվը՝ 4 000—5 000 զինվոր, գրեթե ճշգրիտ համապատասխանում է Ս. Շահումյանի հաղորդած՝ Թորոսի բանակի 4 600 և Տեր-Ավետիքի հաղորդած՝ Դավիթ-բեկի զորքի 900 ընկած մարտիկների ընդհանուր թվին՝ 5 500-ին (ՊՄՇ, էջ 125. ՊՏԱ, էջ 134):

գ) Ս. Շահումյանը պատմում է, որ Կենավուզից Չավնդուր 2 000-անոց օգնական զորք ուղարկելուց հետո, Ֆաթհ-Ալի սուլթանը նահանջեց Բարդուշատ. «Իսկ Փաթալու Սուլթանն իբրեւ լուաւ թէ յօգնականս ետուն նուպարին ի Կենավուզայ, դարձաւ յետս» (ՊՄՇ, էջ 125, հմմտ. Համապատում, էջ 158): Իվան Կարապետը նույնպես ծանուցում է, որ դեռ մինչև Ղարաբաղյան զորաբանակի ժամանելը, թշնամու զորքերը ինչ-ինչ պատճառներով Ղափանից ետ էին քաշվել. «Սւ մեք ղօշունով գնացինք Ղափան, տեսինք, որ խայերն չարթվէլ ին և Քորդի ղօշունըն յետ ին դառցէլ, գնացել»: Պարզ է, որ թշնամու նահանջի պատճառը Կենավուզից ժամանակին հասած օգնությունն էր:

դ) Վերջապես, լիովին համընկնում են ժամանակագրական տվյալները: Որոտնա բերդը գրավվել է 1724 թ. մարտի 29-ին: Ըստ Տեր-Ավետիքի պատմի, Բարգուշատի արշավանքը և Նախիջևանի խանի հարձակումը տեղի են ունեցել Որոտանի գրավումից անմիջապես հետո (ՊՏԱ, էջ 133—134). Ղարաբաղում Ղափանցիների պարտության մասին առաջին լուրն ստացել են ապրիլի 4-ին: Հետևապես, այդ ճակատամարտերը տեղի են ունեցել 1724 թ. մարտի 29-ից մինչև ապրիլի 4-ը ընկած օրերի ընթացքում⁵⁶:

Ս. Շահումյանի, Տեր-Ավետիքի և Իվան Կարապետի հաղորդումների իրար լրացնելու և հաստատելու այս իրողությունը հուշում է, որ գործ ունենք բացառիկ ժամանահավատ աղբյուրների հետ: Հատուկ ուշադրության են արժանի Տեր-Ավետիքի վերհիշած և պատմած հաղորդումները:

* * *

Ի մի բերելով շարադրվածը, կարելի է եզրակացնել.

1) Խմբագրման ընթացքում առաջացած թյուրընկալումների պատճառով Համապատում բնագրի մեջ առաջացել են հետևյալ ընդհանուր բնույթի սխալները.

ա) Նույնացված են Նախիջևանի խանի զորքերի դեմ Դավիթ-բեկի մղած երկու տարբեր ճակատամարտերը.

բ) Սխալ է ներկայացված Դավիթ-բեկի մուտքը Սյունիք. Համապատումից դուրս են մնացել Սիսիան գավառում տեղի ունեցած անցքերը (զորահավաքը և այլն).

գ) Սխալ է նշված նաև Դավիթ-բեկի գլխավորությամբ Վրաստանից Սյունիք ժամանած հայկական զորաշուկատի թվաքանակը:

Թվարկված սխալներից էլ բխում են մի շարք անճշտություններ և շեղումներ, որոնց մասին արդեն խոսել ենք:

2) Նախնական բնագրերի ներկայացված հատվածների քննությունը ցույց

⁵⁶ Ա. Գ. Աբրահամյանը, հաջվի լռելիքով Որոտնա բերդի գրավման իր իսկ պարզած ամիսն ու օրը և հիմնվելով միայն Իվան Կարապետի հաղորդումների վրա, այնուամենայնիվ, ճիշտ է կոռահել 1724 թ. Նախիջևանի խանի հետ Դավիթ-բեկի զորքերի ընդհարման ժամանակը. «Եթե ընդունելու լինենք, որ Նախիջևանի ճակատամարտի լուրը Ղարաբաղ կարող էր հասնել մի քանի օրվա ընթացքում, և Ղարաբաղի հայերը առանց հետաձգելու նրանց օգնության պիտի գնացած լինին, ապա այդ դեպքում Նախիջևանի ճակատամարտը պետք է եղած լինի 1724 թ. ապրիլի սկզբներին» (Ա. Գ. Աբրահամյան. Սյունիքի XVIII դարի..., էջ 172):

է տալիս, որ Ս. Շահումյանն և Տեր-Ավետիքը իրենց իմացածը պատմել են դեպքերի ժամանակագրական կարգին լիովին համապատասխան ձևով: Մինչև 1724 թ. ամառը, ուր ընդհատվում է Ս. Շահումյանի պատումը, գուցե պատմենբերը զուգահեռաբար նկարագրում են դեպքերի իրարահաջորդ ընթացքը: Բնագրերի հրապարակիչը՝ Ս. Սրամյանը, նկատի ունենալով Ս. Շահումյանի պատումը, գրում է. «Առաջին մասին էջերուն մեջ կան... պատմված դեպքերու իրարու հետ անշաղկապ կցումներ, ժամանակագրական ետևառաջություններ, մինչդեռ այդպիսի թերություններ չկան երկրորդ մասին մեջ (այսինքն՝ Տեր-Ավետիքի պատումում—Ա. Ա.)»⁵⁷: Այս գնահատականի ստուգության շափանիչը, անշուշտ, եղել է Համապատում ընազիրը: Մինչդեռ, ինչպես տեսանք, թվարկված թերությունները վերաբերում են ոչ թե Ս. Շահումյանի պատմին, այլ հենց Համապատում շարադրանքին:

ИЗ ИСТОРИИ ОСВОБОДИТЕЛЬНОГО ДВИЖЕНИЯ СЮНИКА 1720-х ГОДОВ

(Опыт сопоставления первоисточников)

А. М. АЙВАЗЯН

Резюме

В 1978 г. в Венеции (на острове св. Лазаря армянских Мхитаристов) вышло в свет полное оригинальное издание «Истории капанцев», включающее в себя как отредактированный Гукасом Себасти сводный вариант этого исторического произведения, так и послужившие первоисточником для Себасти отдельные рассказы двух участников сюнийской (капанской) освободительной войны 1720-х гг.—Степаноса Шаумяна и Тер-Аветика. Однако, значительные различия между двумя первоначальными рассказами и сводным текстом «Истории капанцев» до сих пор остаются вне поля зрения специалистов. В настоящей статье на основе источниковедческого и научно-исторического анализа трех первоисточников «Истории капанцев» и дополнительного материала, относящегося к капанскому движению, рассматривается ряд важных событий 1720-х гг., а также особенности редактирования сводного текста Г. Себасти. Указывается ряд недоразумений сводного текста: 1. отождествлены два различных сражения (1722 г. и 1724 г.) Давид-бека с войсками нахичеванского хана; 2. неправильно представлено вхождение отряда Давид-бека в Сюник (из сводного текста выпали события, происшедшие в гаваре Сисиан); 3. неверно дана численность армянских воинов, прибывших во главе с Давид-беком из Грузии и др. В результате выяснения вышеназванных ошибок по-новому освещаются, в частности, следующие узловые вопросы, связанные с историей указанного периода: доказывалось, что Давид-бек прибыл из Грузии не со своими 30—40 сподвижниками, как принято считать в армянской историографии, а с 2000-ым отрядом армянских воинов; первая битва произошла не в местности Ераблур (Учтепэ), а на реке Нахичеван, где Давид-бек с 6000-ым войском (2000 бойцов, прибывших вместе с ним, и 4000—набранных в гаваре Сисиан) противостоял 12-ти тысячной армии нахичеванского хана. Это первое сражение на армянской земле он проиграл (потери армянской стороны составили 2200 воинов). После этого Давид-бек с оставшимся у него отрядом из 412 человек прорвался в центральную часть капанской провинции, откуда и начал развешивать успешную освободительную войну как против обосновавшихся в Капане персидских феодалов и их ставленников, так и против окружающих враждебных сил. Устанавливается время комбинированного двухстороннего нападения на Капан баргушатского султана Фатх-Али и нахичеванского хана и гибели отряда Торос-бека—между 29 марта и 4 апреля 1724 г. Для проведения дальнейших исследований венецианского издания «Истории капанцев» важнейшим фактором становится утверждаемое в статье положение о том, что рассказы Ст. Шаумяна и Тер-Аветика параллельно описывают капанские события до лета 1724 г., когда прерывается рассказ Ст. Шаумяна.

⁵⁷ Պատմութիւն Ղափանցւոց, Առաջաբան, էջ 78: